

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ՀԱՅ ԵԿԵՂԵՑՈՒ «ԼԱՎԱԳՈՒՅՆ ՈՒՍՈՒՑԻՉ»
ՄՐՑԱՆԱԿԱԲԱՇԽՈՒԹՅԱՆ ԱՌԻԹՈՎ
(10 նոյեմբերի, 2015 թ., Մայր Աթոռ Ս. Էջմիածին)

Գերաշնորհ Սրբազան, հոգևոր հայրեր,

Սիրելի ուսուցիչներ, կրթության բնագավառի պաշտոնյաներ ու պատասխանատուներ եւ բոլոր ներկաներ,

Հայրապետական սիրով ողջունում ենք ձեզ Մայր Աթոռ Սուրբ Էջմիածնում՝ մեր նվիրական հոգևոր կենտրոնում, որտեղից միշտ ուսման եւ կրթության յույսն է տարածվել, հատկապես հայ դպրությունն է սկզբնավորվել մեր ժողովրդի կյանքում:

Այսօր համախմբվել ենք ուրախ առիթով, նաեւ կարևոր առիթով՝ մրցանակներ հանձնելու լավագույն ուսուցիչներին: Մրցանակները շնորհվում են լավագույններին, բայց էական է, որ գնահատվում է ուսուցչի առաքելությունը: Մեզ համար այսօր հոգևոր անհուն ուրախություն է գնահատանքի խոսք ուղղել ձեզ՝ կրթության գործի մշակներիդ, եւ բերել ձեզ Մեր օրհնությունն ու բարեմաղթանքները՝ առ Աստված հայցով, որ բազմապատիկ արդյունավորվեն ձեր գործունեությունն ու ջանքերը:

Մեծ շնորհ եւ պատասխանատվություն է ձեր ուսերին՝ գիտելիք հաղորդելու, իմացության եւ ճանաչողության ուղիներով առաջնորդելու մեր զավակներին, ձեւավորելու նրանց՝ որպես սկզբունքներ ունեցող անհատներ, որպես մեր երկրի հայրենասեր քաղաքացիներ ու մեր ժողովրդի ազգասեր որդիներ եւ դուստրեր: Այս նպատակն ընդհանուր հասարակությանն է, անշուշտ, բայց առավել չափով իրականանում է ձեր ամենօրյա աշխատանքի ու գործունեության արդյունքում: Ձեր նվիրումով, առօրյա ջանքերով են կրթվում եւ հասակ առնում մատաղ սերնդի միտքն ու հոգին, եւ այդ պատճառով երբեք բարձրագույն չէ ասելը, որ ձեր ձեռքերում մեր ժողովրդի ապագան է: Մենք կուզենայինք, որ այս գիտակցությունը ամեն օր ներշնչեր ձեր գործունեությունը:

Գիտենք, որ ձեր աշխատանքը չի սկսվում եւ չի ավարտվում զանգի հնչումով, յուրաքանչյուր դասաժամի դուք նախապատրաստվում եք՝ տրամադրելով ավելի ժամանակ, քան այդ դասաժամն է: Նախապատրաստվում եք ոչ միայն դասանյութի մատուցմանը, այլեւ՝ ձեր սաների հետ ընդ-



Մեր երկրի հզորացման, սահմանների ամրության և ժողովրդի պայծառ գալիքի համար անգնահատելի է ուսյալ զավակի և քաղաքացու դերը (Գարեգին Բ. Կաթողիկոս Ամենայն Հայոց)



Մեր հայցն է առ Աստված, որ մեր մանկավարժների նվիրյալ ջանքերը առատորեն արդյունավորվեն (Գարեգին Բ. Կաթողիկոս Ամենայն Հայոց)



Ճանաչել զիմաստութիւն և զխրատ, իմանալ զբանս հանճարոյ (Առակ. Ա. 2)

հանուր աշխատանքին՝ իբրեւ մանկավարժներ, հոգեբաններ, իբրեւ երկրորդ ծնող: Մեր օրերում համացանցի միջոցով ավելի ու ավելի դյուրին է դառնում գիտելիքների ձեռքբերումը, բայց ուսուցիչը հեղինակություն է ոչ միայն գիտելիք փոխանցելով, այլև՝ օրինակ լինելով եւ վայելելով իր սաների վստահությունը, հարգանքն ու սերը:

Մենք գոհունակությամբ ենք անդրադառնում, որ մեր երկիրը, Կրթության ու գիտության նախարարությունը ավելի մեծ հնարավորություններ է գտնում բարելավելու, արդիական պահանջներին համահունչ դարձնելու ուսումնա կրթությունը, արժանիորեն գնահատելու մանկավարժների գործունեությունը: Գոհունակություն է Հայրապետիս համար, որ գործնում են նաեւ նախարարության եւ մեր Եկեղեցու համագործակցությունն ու համատեղ ծրագրերը՝ ի նպաստ մատաղ սերնդի կրթության, հոգևոր արժեքներով դաստիարակության: Մեր Եկեղեցին նույնպես ջանում է առավել մեծ հնարավորություններ ստեղծել, որպեսզի մեր զավակները սնվեն ու աճեն հավատքով, միմյանց հանդեպ սիրով, արդարության, ճշմարտության արժեքներով, լինեն հավատարիմ որդիները մեր ժողովրդի ու երկրի:

Կրթության գործի սիրելի՛ նվիրյալներ, այս բարեպատեհ առիթով Հայրապետական Մեր գնահատանքն ու օրհնությունն ենք բերում ձեզ: Աղոթք ենք բարձրացնում առ Աստված, որ Իր շնորհներով առատապես շնորհագարդի ձեզ եւ զորակից լինի՝ արգասավորելու ձեր մեծ առաքելությունը մեր ժողովրդի կյանքում: Շնորհավորում ենք մրցանակակիրներին եւ հայցում Բարձրյալի օրհնությունը նրանց կյանքին ու գործունեությանը: Մաղթում ենք, որ ձեր սաները արդարացնեն ձեր եւ մեր ողջ ժողովրդի բոլոր բարի հույսերը:

Մեր գնահատանքն ու օրհնությունն ենք բերում Գերաշնորհ Տ. Վարդան եպիսկոպոս Նավասարդյանին եւ նրա բարեխնամ ղեկավարությամբ գործող Մայր Աթոռի Քրիստոնեական դաստիարակության կենտրոնի աշխատակիցներին, «Լավագույն ուսուցիչ» ծրագրի ազնիվ բարերարներին՝ Իրմա եւ Սիլվիա Տեր-Ստեփանյաններին, մաղթելով գործոց հաջողություններ, նոր շնորհալի նախաձեռնություններ մեր հոգևոր եւ կրթական անդաստանում:

Թող ողորմած Աստված խաղաղ պահի հայրենի մեր երկիրն ու ժողովրդին ի սփյուռս աշխարհի, օրինի հոգևոր ու ազգային կյանքի շենացման, լուսավոր գալիքի կերտման մեր ջանքերը:

Մեր Տեր եւ Փրկիչ Հիսուս Քրիստոսի շնորհներն ու օրհնությունը թող լինեն ամենքիս հետ՝ այսօր եւ հավիտյանս. ամեն: